

## KANENN én inour de SANT MALEU (Locmalo / Diocèse de Vannes)

Document diffusé par [www.kan-iliz.com](http://www.kan-iliz.com)

### Diskan :

**O sant Maleu, karet get Doué,  
Sekouret ni, hou pugalé,  
Drest pep tra eidomb goulennet  
Derhel de Zoué fidél perpet.**

1. Cheleuet ol, krechénion,  
Buhé sant Maleu hou patron  
En èvreu kaer ag é vuhé,  
Hou tougou bras de chervij Doué

2. A Huir-Gastel é ma saùet,  
A duchentil mar des ér bed,  
É dad, er hont a Huir-Gastel,  
E oé un dén mat ha santel.

3. Dé sadorn Vask é oé gañnet,  
Ér memb dé é oé badéet  
Ur sant ar er fons en dalhas  
Hag un eskob er badéas.

4. N'en doé ket hoah é zeuzek vlé  
A p'hum ras a zevri de Zoué :  
Kaset e oé d'un abati  
Eit gobér inou é studí.

5. Maleu, ér léh-sé lan a beah,  
E greskas béan ér santeleah  
Raksé get Doué é oé choéjet,  
Ha d'er garg a véleg saùet.

6. En abad santél, lan a joé,  
De Zoué e laré trugèré,  
Ha, dé ha dé, én abati,  
E garé Maleu muioh mui.

7. Mes eit chervij Doué gredusoh,  
Gobér penijen kaletoh,  
Maleu, get kouraj ha get nerh,  
E vennas hum den én dezerh.

8. En abad, deustou d'en ankin  
En doé d'er hol eit birùikin,  
E ras dehon kousantemant  
Eit kuitat aben er houvand.

9. Sant Maleu e dréz er mor bras,  
Én un inizen e zoaras,  
Un inizen nuah hag ihuél  
Ha tostik tra de Vreih Izél.

10. Inou, o péh konsolasion !  
É kav en ermit Aaron ;  
Ou deu hum daulant, d'er prestan  
D'er penijenneu èhusan.

11. Ha dré baud mat a virakleu  
É splann ol santeleh Maleu,  
Donet e hra tud a vanden,  
Eit er guélet, d'en inizen.

12. Er sant get nerh ha karanté,  
D'en ol e breg er huironé ;  
Ember hileih, doh er hleuet,  
Ou fal vuhé en des chanjet.

13. Neoah paud a dud en hum gleu  
Eit derhel ér vro sant Maleu ;  
Mont e hrant ol d'en inizen,  
Hag eit bout eskob er goulén.

14. Sant Maleu hum gav rè zisté  
Aveit doug ur garg ker ponnér,  
Ha, oeit kuit dré humilité,  
Én ul léh kuhet hum denné.